

严范孙自订年谱

严修著 文津点注

编者按：严修（1860—1929）字范孙，近代著名教育家。他生前在开办新式学校方面做了不少工作，除创办南开学校外，曾在天津筹建、赞助以及资助兴建中小学多所。他是北方最早提倡女子教育和幼儿教育之一人。早在1902年，他就在家中开办保姆讲习所，附设蒙养院。嗣又开办严氏女子小学和严氏女中（即南开女中的前身）。他在任学部侍郎期间，制订各级学校章程，派遣大批学生赴日留学。他自己曾去日本和欧美考察教育。1920年，他设置“范孙奖学金”，选送周恩来同志与李景福二人去欧留学。1959年5月28日，周恩来同志视察南开大学时，曾和冯文潜、黄钰生等南开老同学谈到严范孙，说“严先生是封建社会的一个好人”。

严范孙曾自订年谱，至1918年4月为止。后由高凌霨续补至1929年。天津严氏于1943年曾予刻印，因印数不多，今已罕见流传。为了供研究我国近代教育史者参考，现将刻本中之《严范孙自订年谱》、《严范孙先生年谱补》以及《诰授光禄大夫学部左侍郎严公行状》一并在本刊发表。

据《辞源·南开大学》辞条记云：“……前身为1904年（光绪三十年）创办的私立南开学校。”按《严范孙自订年谱》所记，这一年改家塾英文馆为敬业中学堂，至光绪三十二年（1906），敬业中学始建新校于南开。据此可证《辞源·南开大学》辞条所记是不够准确的，特附记于此。

序 言

严范孙先生于光绪丁酉视学贵州时，以请设经济特科之奏闻于天下。至庚子后，鉴于当世急务，首重兴学，因在籍倡办学堂，不数年，通都名邑，靡然乡风。迨学部既立，乃以清望攸归，遂膺侍郎之命。然谦退不遑，固未尝有竞进意。在官仅逾四年，即乞假还里。嗣虽简授度支大臣，及国变后，累征皆坚辞弗就，惟殷殷于造育英才，始终不倦，其所成就者大矣。先生历年事迹，俱详所为日记中。其自定年谱一卷，殆如史之有年表，鉴之有目录，只撮举纲要，而一生出处，已昭然若揭。每关大事，往往洞烛几先，至若平素，以正义自持。其于友道，尤异乎因炎凉以趋避之者。于此悉可考见也。原著至五十九岁而止，距没时尚阙十一年，高君彤皆近据日记所载，依其体例补之。哲嗣季约爰亟汇录付梓，以衍其传。俛异日更将日记全书刊印流布，固知必为宇内人士所争欲快读者矣。癸未仲春金钺拜题。

范孙自定年谱

咸丰十年庚申（一八六〇年） 生于京东三河县。 我家自戊午避英法联军之难，迁居三河。

咸丰十一年辛酉（一八六一年） 二岁

同治元年壬戌（一八六二年） 三岁 祖母之丧，全家回津。

是年，余患痘几死。 余妹生。

同治二年癸亥（一八六三年） 四岁

同治三年甲子（一八六四年） 五岁 是岁，官军克南京。

同治四年乙丑（一八六五年） 六岁 始入塾，从查师读。以能属对，为师所赏。

- 同治五年丙寅（一八六六年） 六岁 第二妹生后一年余而殇。
从孙师读。
- 同治六年丁卯（一八六七年） 七岁 始为试律。 从周师读。
- 同治七年戊辰（一八六八年） 八岁 从周师读。
- 同治八年己巳（一八六九年） 九岁 冬，从沈师读，《四书》始毕。
- 同治九年庚午（一八七〇年） 十岁 从于师读。始为时文律赋。 五月，天津有河楼教案。
- 同治十年辛未（一八七一年） 十一岁 从于师读。 春，应县试，未取。旋大病，至冬始愈，废书数月。
- 同治十一年壬申（一八七二年） 十二岁 从于师读。 冬，应县府试。祖父逝世。
- 同治十二年癸酉（一八七三年） 十三岁 从于师读。 五月，应院试，取入府学。
- 同治十三年甲戌（一八七四年） 十四岁 从于师读。 八月，兄入府学。 九月，母逝世。 十二月，穆宗大丧。
- 光绪元年乙亥（一八七五年） 十五岁 从于师读。
- 光绪二年丙子（一八七六年） 十六岁 从张师读，仍从于师学赋。 姊殇。 姪女智珠生。
- 光绪三年丁丑（一八七七年） 十七岁 始识陈先生奉周。 奉周博文通西学，表兄宋少南广蓄书籍，与二君游，深获讲贯之益。 八月，应院试，被廩膳生。 九月，李夫人来归。
- 光绪四年戊寅（一八七八年） 十八岁 从张师读。
- 光绪五年己卯（一八七九年） 十九岁 从张师读。 八月，子智崇生。 应乡试不售。 九月，父病，经冬不愈，侍病辍学。
- 光绪六年庚辰（一八八〇年） 二十岁 三月，妹适华。 四月，父歿。 八月，葬。 从张师读。始毕《五经》。 始习算。

光绪七年辛巳（一八八一年） 二十一岁 从张师读。 张幼樵
师主问津书院，谒见，蒙奖借。并同班十人谒见李文忠师。^①
光绪八年壬午（一八八二年） 二十二岁 七月，服除。 中乡
试。 始谒徐荫轩师。^② 十二月，次子智怡生。
光绪九年癸未（一八八三年） 二十三岁 从张师读。 中会
试，改庶常。 八月，姪智惺生。
光绪十年甲申（一八八四年） 二十四岁 补读《尔雅》，兼课
崇儿。 十二月，三子智庸生。 十二月，赴三河，借居盐
店读书。 是岁，有法越之役。
光绪十一年乙酉（一八八五年） 二十五岁 正月、三月，两游
盘山。居三河一年，冬，入都。 腊底还津。
光绪十二年丙戌（一八八六年） 二十六岁 正月，入都。 四
月，散馆改编修。 六月，还津。 七月，入都供职。 六
月，姪女智园生。 九月，女智鬪生。 冬，补国史馆协
修。
光绪十三年丁亥（一八八七年） 二十七岁 在京供职。 三
月，迎春入京。 十二月，女智舒生。
光绪十四年戊子（一八八八年） 二十八岁 在京供职。 正
月，吊宋表兄，还津三日。 四月，考试差。
光绪十五年己丑（一八八九年） 二十九岁 在京供职。 四
月，考试差。 十一月，子智钟生。 充会典馆详校官。
光绪十六年庚寅（一八九〇年） 三十岁 在京供职。 充各直
省乡试试卷磨勘官。
光绪十七年辛卯（一八九一年） 三十一岁 在京供职。 考试
差。 十一月，第三女生。
光绪十八年壬辰（一八九二年） 三十二岁 在京供职。
光绪十九年癸巳（一八九三年） 三十三岁 在京供职。 考试
差。 九月，第三次游盘山。 第五子未晬而殇。

光绪二十年甲午（一八九四年） 三十四岁 在京供职。大考二等。召见一次。考试差。六月，子智开生。八月，授贵州学政。召见两次。九月，出都，家眷留京。十一月，到贵阳。是年，有中东之战。

光绪二十一年乙未（一八九五年） 三十五岁 二月，出省，考上游。夏，还省。秋。出省，考下游。在铜仁府度岁。智崇在京迎娶。

光绪二十二年丙申（一八九六年） 三十六岁 夏，还省。秋，复出省，举行上游科试。途中度岁。

光绪二十三年丁酉（一八九七年） 三十七岁 二月，还省。就学古书院选高材生四十名居之。始习英文。十月，长孙生。奏请设经济特科。任满还津，请假修墓。十二月，发贵阳，在湖南晃州度岁。

光绪二十四年戊戌（一八九八年） 三十八岁 过洞庭，经岳州、武昌、上海。二月，到宁波，赴慈溪东乡扫墓。三月，到家。四月，入都。召见一次。因经济特科之奏，见绝于徐荫轩师。四月，请假回籍。表叔陈竹轩公歿。六月，兄歿，迎眷回津。是岁，有政变。

光绪二十五年己亥（一八九九年） 三十九岁 在籍。冬，为智怡授室。第七子生。

光绪二十六年庚子（一九〇〇年） 四十岁 在籍。“拳匪”之乱，六月十八日津城陷。是月，长孙女生。陈奉周歿。姪女智珠故。第七子及长孙先后殇。

光绪二十七年辛丑（一九〇一年） 四十一岁 在籍。割去额上及臂上之瘤。改定先人所设义塾课程。又借陶氏宅，设学一处。王君寅皆、林君墨卿、张君伯苓终日讨论学事。陶仲铭歿。冬，两宫还京。女智安生。孙女仁菊生。

光绪二十八年壬寅（一九〇二年） 四十二岁 在籍。 天津交还。王竹林君、李子赫君捐资设学，邀余与共。夏，借镫牌公所，设两斋。六月，子智庸殇。七月，率子崇怡游日本。十月，由上海归。余在日本时，墨卿诸君将镫牌公所之两斋移会文书院，且增一斋，余归又增两斋，始名为**国立第一小学堂**。墨卿与王寅皆之力为多。孙女仁清生。姪孙仁曾生。

光绪二十九年癸卯（一九〇三年） 四十三岁 在籍。 墨卿又功卞、张两家设**国立第二小学堂**。官立小学亦成立三处。孙仁绪生。

光绪三十年甲辰（一九〇四年） 四十四岁 春，又成立官立小学□处。三月，代胡月舫**总理直隶学校司**。司设于保定，寻改名学务处。四月，再往日本游历。八月，归。延订保定师范学校教员到保定就职。王寅皆歿。在保定设**初级师范学校**一处。设《学务报》。派官绅赴日本习法政。报告县兴学考成。改家塾英文馆为**敬业中学堂**。

谨案：辛亥以前，按照奏定章程一律名学堂。自壬子始称学校。本年内，校似应作堂，凡两处，下年同。

光绪三十一年乙巳（一九〇五年） 四十五岁 移学务处于天津，分科办事。往来京、保。派各县绅士出洋游历。改保定之校士馆为普通科学馆。省城**初级师范学校**续招第二班。春，次女适华。冬，长女适卞。设各县**劝学所**。筹设北洋师范、法政等学堂。改天津校士馆为**师范学校**。收回法国人在如意庵所设之学堂。收回普通学堂，改为**天津府中学堂**。家中设女小学，设保姆科，幼稚园。冬，署学部右侍郎，十一月，到任。

谨案：铃铛阁普通学堂与如意庵外人所办之学堂不同，初由绅办，二十九年移交知府衙门接收，改官立中学堂。至

三十一年，由学务处改天津府中学堂。是条似应云改官立中学堂为天津府中学堂。

光绪三十二年丙午（一九〇六年） 四十六岁 在京供职。转左侍郎。是岁，各省学政改为提学使。提学使未经出洋者，补派出洋。请日本人讲教育行政。考试毕业回国之留学生，各科皆授进士、举人，惟医授医士，部争之，乃从同。敬业中学始建新校于南开。孙仁叶生。孙仁芝生十二岁殇。

光绪三十三年丁未（一九〇七年） 四十七岁 在京供职。八月，张文襄公^③管部。女师范章程奏准。

光绪三十四年戊申（一九〇八年） 四十八岁 在京供职。派充考验询问各省保荐人才大臣。冬，两宫大丧。为袁尚书^④罢职疏请留外务部尚书任，疏留中。孙仁荫、仁泽、姪孙仁统生。

宣统元年己酉（一九〇九年） 四十九岁 在京供职。派充考试留学生阅卷大臣。张文襄公薨于位。冬十一月，奉派赴东陵。游盘山第四次。十二月，请假修墓。回津度岁。

宣统二年庚戌（一九一〇年） 五十岁 正月，南游。由彰德至汉口、九江、上海、宁波，再赴慈溪东乡扫墓已，又游杭州、苏州、镇江、登焦山。三月，还津。奏请开缺。秋，往定兴，送鹿相国^⑤丧。智钟娶韩氏。孙仁赓生。

谨案：是年十二月，先生孙仁远生，应补。

宣统三年辛亥（一九一一年） 五十一岁 因债累太重，租引地于郭氏，旋作废，更称贷而支拄之。所办学校，或停或并，或由劝学所接管，仅担任初等小学二处，附蒙养园。八月，武昌事起。袁官保入为内阁总理，余奉旨授为度支大臣，电请总理代辞。又奉派充南北议和 大臣，亦电辞。十二月二十五日，清廷下诏逊位。正月，怡妇曹病故。十一

月，续娶夏氏。夏，第三女智闲适卢。

民国元年壬子（一九一二年） 五十二岁 从民国令用阳历。

二月，官绅联合会成立，举余为会长，凡月余而解散。七月，赴日本。九月，归国。

民国二年癸丑（一九一三年） 五十三岁 姪智惺故。七月，率袁氏诸生兄弟三人赴欧洲，游历俄、比、德、法、和兰、瑞士诸国，居伦敦。孙仁颖、孙女仁英生。

民国三年甲寅（一九一四年） 五十四岁 二月，电传授教育总长之令，请驻英公使代辞，己亦电辞。三月，女智黼率两女来依俶成于伦敦。五月，离英国，至法，至义，至匈，至奥。仍由西伯利亚回国。阅报见中央新派参议院参政多人，余亦与焉。嫂氏歿。入都，辞参政，虽不见允，终未就职。冬，入都，居北海，照料袁氏诸生读书。

民国四年乙卯（一九一五年） 五十五岁 袁总统欲于辉县苏门建大学，属余赴辉县查看建学地址。归过顺德，参观学校。赴上海，观东亚运动会。游杭州。孙仁华生。八月，筹安会起，入都争之，不得，遂绝迹于北海。

民国五年丙辰（一九一六年） 五十六岁 洪宪帝制取消，余复入都，居北海一日，旋归津。五月，袁总统歿，吊毕，即日归。七月，同张君伯苓游明陵，过长城，至张家口、宣化县。八月，往彰德送葬。家中女学复设高等班。在居宅之对门设贫民义塾。九月，同王少泉登泰山，游西湖。孙女仁斌生。

民国六年丁巳（一九一七年） 五十七岁 四月，同卢木斋游杭州、绍兴、桐庐、富阳等处。又同章馥亭游苏州，泛太湖。五月，还津。六月，李经羲组织内阁，电召余为教育总长，黎总统亦有电，覆电婉辞之。七月，复辟未成，大战于京师。直隶大水。八月，天津大水。入都，与河工讨论

会。十二月，与内子先后入都，居崇儿寓所度岁。

民国七年戊午（一九一八年）五十八岁 孙仁驹生。三月，就京师日本同仁医院割去右足之瘤。四月，取道日本赴美洲。

谨案：先生子智开，于民国三年五月娶陶氏，民国六年三月陶氏卒，应补。

注：①李文忠师：指李鸿章。李鸿章歿后谥文忠。

②徐荫轩师：指徐桐。徐桐字荫轩。

③张文襄公：指张之洞。张之洞歿后谥文襄。

④袁尚书：指袁世凯。

⑤鹿相国：指鹿传麟。

严范孙先生年谱补

民国七年戊午 十一月，先生长子智崇卒于日本。十二月，先生归自美洲。晋京。先生姑适沈氏者逝世。

民国八年己未（一九一九年）五十九岁 赴彰德，应袁氏襄题之请。赴太原，参观华北运动会，遂游晋祠。游金陵及金、焦，至于西湖而返。避暑北戴河。晋京两次。先生家中女学成立中学班。

民国九年庚申（一九二〇年）六十岁 赴汤山，浴温泉。避暑北戴河。先生姪孙仁曾赴美留学。就海军医院割去两瘤。先生孙女仁梅生。是年，有直皖之战，奉军入关助直。

民国十年辛酉（一九二一年）六十一岁 避暑香山。先生孙仁覃生。晋京两次。门罗博士来天津。

民国十一年壬戌（一九二二年）六十二岁 先生孙女仁莫生。晋京，赴清华园。习童子功。是年，有直奉之战，奉军退。

民国十二年癸亥（一九二三年） 六十三岁 晋京。先生子智开续娶全氏。再晋京，入协和医院割治摄护腺肿瘤。先生姪孙仁曾授室。乡人捐资重修文庙，先生与焉。

民国十三年甲子（一九二四年） 六十四岁 先生孙女仁莲生。臀肉生核，延沈医割治。是年，直奉再战，直军退。

民国十四年乙丑（一九二五年） 六十五岁 因尿道不利，就协和医院治疗，凡晋京四次。遂避暑西山卧佛寺。先生孙女仁荃、姪曾孙文禄生。先生孙女仁菊于归方氏。是年，李军退，冯军入境。

民国十五年丙寅（一九二六年） 六十六岁 晋京两次。先生孙女仁棠生。先生长孙仁绪授室。十月，结婚五十年，举行金婚式。是年，冯军退，败兵肆扰，与绅商筹议维持，迄无善法，张褚军入境乃已。

民国十六年丁卯（一九二七年） 六十七岁 晋京两次。先生姪曾孙文祁、曾孙文朋生。先生长孙妇魁氏卒。与同人筹立崇化学会，聘长洲章式之先生主讲，十月开学。

民国十七年戊辰（一九二八年） 六十八岁 崇化学会讲席暂假西罩棚，与同人分日招待。五月，晋京。先生长孙女仁荷于归曹氏。六月，张褚退，人心浮动，与同人面请当局设法镇压。七月，避暑西山。十一月，杨村参观石幢开幕礼。

民国十八年己巳（一九二九年） 六十九岁 病中作自挽诗，手书出示学会同人。三月十五日终。

先生自著年谱，至戊午夏止，距先生之没尚有十一年，事应补。爰摘取历年日记所载，依前体例辄足成之。前所自著者偶有小误，僭加案语，俾归于是，亦传信之意耳。高凌雯谨识。

诰授光禄大夫学部左侍郎严公行状

曾祖讳汝汉，诰赠光禄大夫。曾祖妣武，诰赠一品夫人。祖讳道尊，诰赠光禄大夫。祖妣王，诰赠一品夫人。本生祖，讳家瑞，赠光禄大夫。本生祖妣陈，赠一品夫人。考讳克宽，候选员外郎，诰授奉直大夫，诰赠光禄大夫。妣陈、继妣王，俱诰封宜人，诰赠一品夫人。公讳修，字范孙，姓严氏。先世自慈溪迁天津。五传至仁波公，是为公父，修德行仁，凡乡里义举无不与。岁饥办赈，以私财给公费，恒数千金不惜，远近称善士。公生而俊拔多慧。八岁，与兄同塾，兄为试帖，构思未就，公若有得，师觉而问之，具以对，师喜，自此遂为诗。年十四，补郡庠生^①，十八食廩饩^②。光绪壬午，举于乡。翌年，成进士，改庶吉士，散馆授编修，充国史馆协修，会典馆详校官。公在翰林有声，顾谦约无竞进意。定例科场入簾者，戚族回避不得与试，公虽考差，每会试前必请假，先自避之。甲午，大考翰詹，列二等。是年，简贵州学政，行部所至，勉士子读书，有熟于经者，使背诵能无误者，优奖之。发题避纤仄，使得尽言，以觇胸臆，随方施教，如课生徒。就省城学古书院选高材生四十人，住斋肄业，广购书籍，恣其探讨。刊印前贤所著《先正读书诀》、《辘轩语》、《书目答问》，分饷远近，使识门径，辅训告所未及。黔人相庆，以为得贤宗师。减供张，禁需索，其有不足，分俸益之，薄己厚人。差旋而家举债。公在任，尝援照先朝召试博学鸿词例，有请设经济特科之奏，朝议允之。海内明达，方谓帖括之学不足以济时，此科既开，庶有得人之望，而掌院学士徐公桐独恶之。徐公，公座师也，至拒其通谒。假归里居。二年，值义和拳之乱，公谓民智未开，不学故也。逮事甫平，国家新制未颁，公已筹设小学一区以为倡，不数年间，兼营并举，庠校如林矣。公有家塾，后扩为南开中学及大学者，其时已由英文馆改为敬业

中学，生徒济济，称极盛焉。故学堂之设，天津实开其先。总督项城袁公冀推行一省也，以公总理直隶学务处。未几，学部立。公先以捐资兴学，赏给五品卿衔，至是诏以候补三品京堂署右侍郎，不赴。尚书荣公庆使使敦促，至长跪，乃允。旋真除转左。在部四年，事多创举。人以公办学有验，建白宜无不从，公乃退然，不专不僭，有所咨而后言，必待议而后行，凡百设施，什九出公意而不见其迹。自来居高位者，于庶政揽其要而已，公则兼理其繁，恒日晡方辍，人谓严公贰部，勤劳甚于司官。岁戊申，袁公以外务部尚书军机大臣被黜，公素知其智略，缓急有足恃，奏请仍留原部。疏入不报。乙酉，请假赴原籍慈溪扫墓。翌年，奏请开缺。宣统辛亥，袁公再起总理内阁，以朝旨召为度支大臣。公在官时，无日不思去位。初为学部，语人曰：吾书生，无政治才行，当避贤路耳。天怀淡定，不以利禄为荣久矣。遂力辞之。复派充南北议和大臣，国变后，征为参议院参政，两次推为教育总长，终不一就。公仁厚有容，无疾言遽色，尤谨内行，父病疽，废书侍左右，燂汤熨药，历半载弗衰。父没事兄，能曲顺其意。家故多善举，率旧而行，不以困阻。庚子城陷，公居西偏，避难来依者，朋戚援引，累百余口，一例视之，饮食无稍阙，即疾病死亡，无稍厌。交友以诚，视人皆胜己，有善不去口，不逆不亿，以为天下无恶人，即有过亦可以忠言进。在籍闻袁氏筹安会起，急入都力争，家人惶骇恐有祸，公固坦然，以为友道应尔也。积书充栋，天津图书馆立，捐五万卷实其中，而家尚藏千六百余种之多。从政余闲，或行途旅邸，未尝释卷，而匡居诵读可知。为学好博览，多识前言往行，而不骛著作。读经必究训诂，读史不遗表志。凡前代名家专集与宋元明儒学案，罔不寓目，而《近思录》诵尤勤。其律身大旨：曰主敬、曰强制、曰有恒。所为日记，时有警惕语，盖惰既废事，慢亦败德，二者终身戒之，惟恐不力也。自科学兴，畴人之术为有用，公少与同里

陈璋游，即治此学。及督学时，复延师使书院诸生习演，尝亲课之，而已亦从人习英国文字。喜读新书，慕东西各国政教，生平尝三游日本，一游欧，一游美，所至揽其山川，友其士大夫，得识彼邦文物声名之所在，志怡神旷，跋涉忘劳，盖其最后之游，年且六十矣。以民国十八年三月十五日终于里第，实生于咸丰庚申三月十二日，春秋七十^①。生前封奏不留稿，戒家人勿刻集，友人辑其诗得八百余首，厘为三卷，题曰：《严范孙先生古近体诗存稿》。夫人李氏，同县咸丰乙卯举人安肃训导秉璋公女。子：智崇，荫生、民政部主事、日本公使馆秘书，前卒；智怡，日本东京高等工业学校毕业生、河北省委员、教育厅长；智庸，绩学能文，未冠卒；智钟，日本东京帝国大学医科毕业生、卫生署司长；智开，日本东京美术学校毕业生、北京艺术专门学校校长。孙：仁绪、仁叶、仁荫、仁泽、仁赓、仁远、仁颖、仁华、仁驹、仁覃、仁緝。曾孙三人。女：长适同县卞燕昌子肇新，次适同县华世奎子泽宣，次适沔阳卢靖子南生，一未字。孙女十人，曾孙女二人。公没十二年，传志尚阙，智钟、智开举以相属，凌雯不学且老，无复能为词，顾以忝附门墙，又尝备官学部，义不容视公一生志行久而就湮，不自忖量，即素所见知者，证以公自为年谱，撰次以存大略。其为词也，质固有之，谀则未敢，立言君子，倘有择焉。辛巳门人高凌雯谨状。

注：①按《年谱》，补郡庠生，谱主年十三岁。

②按《年谱》，食廩饩，谱主年十七岁。

③按《年谱》，谱主春秋六十九。